

Na osnovu člana 16. stav (1) i člana 17. stav (2) Zakona o Vladi Hercegovačko - neretvanskog kantona („Službene novine HNK“, broj: 3/07, 5/09), i na osnovu člana 28. stav (6) Zakona o koncesijama Hercegovačko - neretvanskog kantona („Službene novine HNK“, broj: 1/13), Vlada HNK je na 24. sjednici, održanoj dana 30.06.2016. godine donijela

**ODLUKU
O DODJELI KONCESIJE ZA ZEMLJIŠTE ZA IZGRADNJU
VJETROELEKTRANE PLOČNO, GRAD MOSTAR**

I

Vlada Hercegovačko - neretvanskog kantona kao Koncesor, dodjeljuje koncesiju za zemljište u državnom vlasništvu za izgradnju vjetroelektrane Pločno, kojim je obuhvaćen dio kompletnog projekta vjetroelektrane Pločno, koju čine 16. Vjetroagregata, ukupno instalirane snage od oko 48 MW, Koncesionaru privrednom društvu „ENERGY 3“ d.o.o. Mostar.

II

(1) Predmet koncesije iz tačke 1. ove Odluke je 8 lokacija, za izgradnju 8 vjetroagregata, koje se nalaze unutar područja Pločno, okonturenog koordinatama A: 6497 504 – 4808 798, B: 6497 539 – 4803 104, C: 6496 348 – 4802 775, D: 6495 769 – 4804 027, E: 6495 465 – 4808 218, na lokalitetu Malo Pločno, Veliko Pločno i Malo Ruište, Grad Mostar, gdje površina mikrolokacije svakog pojedinog vjetroagregata iznosi oko 2.500 m², a konačan položaj će se odrediti u daljem postupku optimizacije rasporeda vjetroagregata i odabira najpovoljnije varijante rješenja.

(2) Lokacije iz stava (1) ove tačke nalaze se na parcelama označenim kako slijedi:

Broj vjetroturbine	Oznaka katastarske čestice	Katastarska općina
1	8/45	Humilišani
2	1339/1	Zijemlje
3	1333/1	Zijemlje
4	1333/1	Zijemlje
10	679/1	Kutilivač
11	684/1	Kutilivač
12	2694	Zijemlje
13	2694	Zijemlje

III

(1) Koncesija se dodjeljuje na period od 30 (trideset) godina od dana početka korištenja koncesije.

(2) Vrijeme početka korištenja koncesije odredit će se ugovorom o koncesiji, s tim da se vrijeme početka korištenja koncesije ne može računati prije početka izvođenja građevinskih radova izgradnje vjetroelektrane.

(3) Koncesija prestaje istekom tridesete godine od dana početka korištenja koncesije.

IV

- (1) Prava i obaveze Koncesora i Koncesionara precizirat će se ugovorom o koncesiji koji će, uz prethodnu saglasnost Vlade i pribavljeno mišljenje Kantonalnog javnog pravobranilaštva, u ime Koncesora s Koncesionarom potpisati ministar privrede HNK.
- (2) Krajnji rok za potpisivanje ugovora iz stava (1) ove tačke je 30 dana od dana konačnosti ove Odluke.
- (3) Eventualne izmjene i dopune ugovora o koncesiji, te raskid ugovora o koncesiji ukoliko za to nastanu zakonski uslovi, vrši se na isti način i postupak kao kod zaključenja ugovora.

V

- (1) Jednokratna koncesiona naknada iznosi 138.431,25 KM (slovima: stotnutridesetosamhiljadačetiristotinetridesetijednakonvertibilnamarka i 25/100).
- (2) Tekuća koncesiona naknada za zauzeto zemljište će se obračunavati kao umnožak zauzete površine i jedinične cijene dugoročnog zakupa prema cijenama lokalne zajednice.
- (3) Tekuća koncesiona naknada za korištenje energetskeg postrojenja će se obračunati u iznosu od 2,5 % od bruto prihoda ostvarenog po osnovu ukupno proizvedene električne energije, s tim da se ugovorom o koncesiji precizira broj vjetroagregata.
- (4) Sredstvo obezbjeđenja za izvršavanje obaveza plaćanja jednokratne i tekuće (godišnje) koncesione naknade, je bezuslovna bankarska garancija za svaku vrstu naknade posebno, i to u vrijednosti iznosa ovih naknada, a ugovorom o koncesiji pobliže će se propisati ova obaveza Koncesionara, kao i rokovi za dostavu ovih garancija, te posljedice neizvršavanja obaveze plaćanja ovih naknada.

VI

- (1) Koncesiona djelatnost obavljat će se na način i pod uslovima propisanim svim zakonskim propisima koji regulišu oblast izgradnje energetskih projekata ove vrste i Zakonom o koncesijama Hercegovačko - neretvanskog kantona, kao i na osnovu rješenja datih u Idejnom projektu.
- (2) Zakonski propisi i standardi koji regulišu pitanja zaštite okoline, prostornog planiranja, šumarstva, vodoprivrede i zaštite na radu, su također obavezujući za koncesionara.

VII

Ugovorom o koncesiji obavezno će se propisati i slijedeće obaveze:

- a) da se Koncesionar obavezuje prije početka korištenja koncesije, na svoj trošak i na svoj rizik, ishodovati sve dozvole/saglasnosti koje su propisane posebnim zakonima koji regulišu oblast zaštite okoline, prostornog planiranja, šumarstva, vodoprivrede i zaštite na radu, ukoliko postoje zakonske obaveze i uslovi za to ishodovanje;
- b) da će Koncesionar izvršiti uslove propisane Saglasnošću Grada Mostara, broj: 02-19-13066/14-1 od 22.01.2016. godine;
- c) da će se implementacija projekta vršiti u skladu sa dostavljenim Termin planom realizacije.
- d) da će garancija za implementaciju Projekta, u smislu izvršenja obaveza iz Termin plana, biti u vidu depozita u procentu koji odredi Operator za OIEiK ili bankovna garancija na taj iznos naplativa po pozivu;

- e) da će se ugovor o koncesiji raskinuti pod uslovima predviđenim Zakonom o koncesijama, kao i ako koncesionar tri godine za redom proizvede na godišnjem nivou manje od 20% od planirane godišnje proizvodnje električne energije;
- f) da je za nadzor nad ostvarenjem koncesije nadležno Ministarstvo privrede, ili lice koje ministar privrede ovlasti, kao i Ministarstvo finansija za nadzor nad ispunjenjem finansijskih obaveza;
- g) da se dodijeljena koncesija može prenijeti na drugo pravno lice u skladu sa Zakonom o koncesijama;
- h) sve druge odredbe propisane članom 32. Zakona o koncesijama Hercegovačko – neretvanskog kantona, kao i one koje su od značaja za predmetnu koncesiju.

VIII

Termin plan realizacije cijelog projekta će biti sastavni dio ugovora o koncesiji, s tim da je krajnji rok za izgradnju svih vjetroelektrana i dobijanje upotrebnih dozvola za iste tri godine od dana zaključivanja ugovora o koncesiji.

IX

Nezadovoljni učesnik postupka za dodjelu koncesije može, u roku od 15 dana od dana objavljivanja ove Odluke, Vladi Hercegovačko - neretvanskog kantona podnijeti zahtjev za preispitivanje Odluke u skladu sa članom 29. Zakona o koncesijama Hercegovačko - neretvanskog kantona.

X

Odluka stupa na snagu danom njene konačnosti, a objavit će se u „Službenim novinama Hercegovačko - neretvanskog kantona“.

Bosna i Hercegovina
Federacija Bosne i Hercegovine
HERCEGOVAČKO-NERETVANSKI KANTON
V L A D A

Broj: 01-1-02-1409/16
Mostar, 30.06.2016.godine

P R E D S J E D N I K

dr.sc. Nevenko Herceg